

SUBIRA

Y. Ulenge

1. Subira ina mashaka
Hupati kitu haraka
Hata kama unataka
Huna budi kungojea.
2. Utakaa usumbuke,
Na wengine wakucheke
Mawazo yatapanyike
Fikira zimepotea.
3. Kila siku, "Nitapata"
Wenzako wanakupita,
Huishiwi na matata,
Hujui kuyatatua.
4. Ukikaa hufuruki,
Roho yako ina chuki,
Maana hujamiliki,
Umekaa wangojea.
5. Kibichi ukisubiri
Unangoja kinawiri
Kibivu kina hatari
Mara kitajiozea.
6. Lakini imehimizwa
Subira kutekelezwa
Imani yako hukuzwa
Ikiwa umeridhia.
7. Ukapata mahitaji
Yale unayotaraji
Mungu akakufaraji
Ikawa washangilia.
8. Mwenyewe umeridhika
Na kicheko ukacheka
Ukasahau mashaka
Yaliyokukupatia.
9. Bali kuna mau nivu
Uwe na uvumilivu
Kibichi kiwe kibivu
Ukipandacho kukua.
10. Vingine ni vya ajabu
Vinaishi kama bubu
Vikakuwa taratibu
Mpaka vimetokea.
11. Vikuavyo kwa rehema
Tumboni mwa kina mama
Uvingoje kwa lazima
Iwe vya kuhudumia.
12. Navyo havina haraka
Uvisubiri kwa miaka
Kila siku hekaheka
Wewe unangojelea.
13. Nawe unavisubiri
Vipate kukusitiri
Wewe bado unakiri
Mwenyewe wavumilia.
14. Hayo madhila mazito
Yakutia roho joto
Ikawa una fukuto
Na machozi ukalia.
15. Ukawaza ole wangu
Sipati hata wenzangu
Ndugu na watoto wangu
Wameacha kurijia.
16. Subira ina uzito,
Na kutia roho joto,
Ukakumbuka uzito,
Fahamu zikapotea.

17. Ukisubiri mauti,
Nayo yapo kwa wakati
Mfano wa kizingiti
Hayaachi kukuja.

18. Tamaa hutangulia,
Nawe unajipangia
Mauti hukufikia
Nyuma na kukuvamia.

19. Lakini utafakuri
Kila unaposubiri
Kuna mengine ya siri,
Pengine hukutokea.

20. Ninaomba jibu lako,
Kujua mawazo yako,
Nitulize sikitiko,
Labda nitatulia.